

## **В СРЕДУ 2-Я СЕДМИЦЫ ВЕЧЕРА,**

**на Господи воззвах поставим стихов 10: и поем настоящий самогласен дважды, и мученичен, и подобны 3.**

### **Самогласен, глас 1:**

Духовный, братие, вземше пост, / языком не глаголите льстивная, / ниже полагайте претыкания брату в соблазн: / но покаянием просветивше души свещу слезами, / возопиим Христу: / остави нам грехопадения наша, / яко Человеколюбец.

**Мученичен:** Всехвальнии мученицы, / вас ни земля потаила есть, / но небо прият: / отверзошася вам райская врата / и внутрь бывше, / древа жизни наслаждаетесь, / Христу молитесь, / дароватися душам нашим миру, / и велией милости.

### **Ины стихиры господина Иосифа, глас 3.**

#### **Подобен: Велия Креста:**

Божественных апостол Господи моленьми, / постное время добре нам совершити, / умилением помысла сподоби, / яко Благ благоутробне, / да спасаеми Тя прославляем вси.

#### **Подобен:**

Великое и страшное Твое Господи пришествие, / в немже седа суд праведный сотвориши, / да не убо осудиши мя осужденнаго: / но яко Бог пощади мя, / апостол Твоих благоприятными молитвами.

### **Ина стихира господина Феодора, глас 6.**

#### **Подобен: Всю отложивше:**

Христовы апостоли, / земным светила, / сокровища миробогатная, / всемудраго разума Бога нашего: / вас поющая искушений избавите / святыми вашими молитвами, / и время нам постное проводити / юношески подаючи в мире жизнь нашу: / да благоугодно предваривше страсть Христову, / со дерзновением приносим пения Богу нашему.

### **И в Минеи 4. Слава, и ныне, Богородичен:**

**Прокимен, псалом 31, глас 6: Веселитесь о Господе, и радуйтесь праведнии.**

**Стих: Блажени, ихже оставишася беззакония.**

### **Бытия чтение. [Глава 4, ст. 16 – 26.]**

Изыде Каин от лица Божия, и вселися в землю Наид, прямо Едему. И позна Каин жену свою, и заченши роди Еноха: и бе зиждяй град, и именована град во имя сына своего, Енох. Родися же Еноху Гаидад, и Гаидад роди Малелеила: и Малелеил роди Мафусала: Мафусал же роди Ламеха. И взя себе Ламех две жены: имя единой Ада, и имя второй Селла. И роди Ада Иовила: сей

бѣше отецъ живущихъ въ селениихъ скотопитателей. И имя брату его, Иувалъ: сей бѣше показавый певницу, и гусли. Селла же и тая роди Фовела, сей бѣше млатобиецъ, ковачъ меди и железа: сестра же Фовелова, Ноема. Рече же Ламехъ своимъ женамъ: Ада и Селла, услышите гласъ мой жены Ламеховы, внушите моя словеса: яко мужа убихъ въ язву мнѣ, и юношу въ струпъ мнѣ. Яко седмицею отмстися отъ Каина, отъ Ламеха же семьдесятъ седмицею. Позна же Адамъ Еву жену свою, и зачещи роди сына, и именована имя ему Сифъ, глаголющи: воскреси бо ми Богъ семя другое, вместо Авеля, егоже уби Каинъ. И Сифу бысть сынъ: именована же имя ему Еносъ, сей упова призвати имя Господа Бога.

**Прокимен, псалом 32, глас 1: Буди Господи милость Твоя на нас, якоже уповахом на Тя.**

**Стих: Радуйтесь праведнии о Господе:**

**Притчей чтение. [Глава 5, ст. 5 – 23. Глава 6, ст. 1 – 3.]**

Сыне, пий воды отъ своихъ сосудовъ, и отъ твоихъ кладенцевъ источника: да преизливаются тебѣ воды отъ твоего источника, во твои же пути да происходятъ твоя воды. Да будутъ тебѣ единому имения, и да никтоже чуждъ причастится тебѣ. Источникъ твоя вода да будетъ тебѣ твой, и веселися съ женою яже отъ юности твоя. Елень любви, и жребя твоихъ благодатей да беседуетъ тебѣ, твоя же да предыдетъ тебѣ, и да будетъ съ тобою во всяко время: въ дружбѣ бо сея спребывай, умноженъ будещи. Не многъ буди къ чуждеи, ниже объятъ буди объятии не твоя. Предъ очима бо суть Божиима пути мужа, вся же теченія его назираетъ. Законопреступления мужа уловляютъ: пленицами же своихъ греховъ кийждо затязается. Сей скончается съ ненаказанными: отъ множества же своего житія извержется, и погибаетъ за безуміе. Сыне, аще поручишися за твоего друга, предаши твою руку врагу. Сеть бо крепка мужу свои устне, и пленяется устнами своихъ устъ. Твори сыне, яже азъ заповѣдаю ти, и спасайся.

**И абие преждеосвященная Литургия.**

## **В ЧЕТВЕРТОК 2-Я СЕДМИЦЫ НА УТРЕНИ, ТРОИЧНЫ.**

**По 1-м стихословии седальны апостольския Осмогласника, с Богородичным.**

**По 2-м же стихословии глаголем настоящия седальны, глас 3.**

**Подобен: Красоте девства.**

**Х**ристос лоза красная, гроздия вас принесе, / сладость спасительную напаяющая земли, / апостоли богоноснии: / темже мя избавите сластей пиянства, / молюся, струи умиления души моей / дарующе в божественном пощения дни: / яко да спасея живот получу.

**Слава, тойже.**

**И ныне, Богородичен:**

**М**илосердия Твоего богатство безмерное, / и могущества Твоего державу непреборимую приемля во ум, / притекох к крову Твоему, скорбию содержимь, / и люте недоумеваю, / зову из глубины моего сердца со слезами: / Дево Богородице, / помогай ми, едина миру предстательство.

**По 3-м стихословии седален, глас 6.**

**Подобен: Господи предстояше:**

**Г**осподи благоуветлив буди нам, в сие божественное время, слезы точити Тебе от сердца сподоби всегда, ко отмовению скверн душевных, и к прозябению святых заповедей: яко да сице постящися, достойно благоугодим Тебе, и всечестную Твою страсть всем видети благоизволи, молитвами Твоих миропасительных апостол, слава Тебе.

**Слава, тойже.**

**И ныне, Богородичен:**

**М**илосердия источник Пречистая, Честная Дево Мати Богородице, богато на ны Чистая излей, и даруй нам согрешений оставление: Ты бо еси предстательство наше и Божественный покров.

**Канон Минеи, и настоящий трипеснец господина Иосифа. Глас 3.**

**Песнь 4.**

**Ирмос: Еда в реках прогневаешия:**

**П**иянство сластей душетленных угасивше, умиления питием, поста ради угобзимся.

**П**остися душе невоздержания снеди, насладися добрых виденьми, да вышнюю трапезу улужиши.

**У**глие огня невещественнаго суще, попалите страстей моих вещество, божественнии апостоли Спасовы.

**Богородичен:** Плоть Христу от Твояе взаим давшая, умертви плоти мояе страсти, жизнородительнице Чистая Дево.

### **Иный трипеснец господина Феодора. Глас 6.**

**Ирмос:** Услыша пророк пришествие Твое Господи, / и убояся, / яко хочещи от Девы родитися, / и человеком явитися, и глаголаше: / услышах слух Твой / и убояхся, / слава силе Твоей Господи.

Двоенадесятице апостолов, Петре, Павле, Иакове и Иоанне, Андрее, Варфоломее, Филиппе, Фома и Матфее и Иакове, с Симоном и Иудой, молитвы сотворите Христу, спаситися нам.

Мрежи учений ввергше в море жития странно, к трием сто и пятьдесят, тайно языки яко рыбы прежде уловисте, сия ко Господу приведше святии апостоли.

**Слава, Троицен:** Сына от Отца и Духа славлю, яко от солнца свет, и лучу. Оваго убо рождественне, зане и рождение: Оваго же происходне, зане и происхождение, собезначальную Божественную Троицу, покланяемую от всякия твари.

**Богородичен:** Дево Младенца родившая, и чистоту соблюдшая, Чистая Ты явилася еси, Бога рождши и Человека, единого Того во обою зраку: чудо Твое Дево Мати, ужасает всякий слух и помысл.

**Слава Тебе Боже наш, слава Тебе.**

Вы есте свет миру, якоже вам рече Христос, сиянием слова: но молитесь апостоли, великодушно препроводити нам поприще воздержания, и поклонитися Того Воскресению.

**Ирмос:** Услыша пророк пришествие Твое Господи, / и убояся, / яко хочещи от Девы родитися, / и человеком явитися, и глаголаше: / услышах слух Твой / и убояхся, / слава силе Твоей Господи.

### **Песнь 8.**

**Ирмос:** В пламень ко отроком:

Умертвився многими грехи, мертвую приношу душу в житии. Темже мя ущедрите живоносными молитвами вашими боговидцы, ученицы Спасовы.

Объят быв греха мглою, аду приближихся отчаяния воистинну. Темже мя просветите, Солнца славы тайныя лучи, суще боговидцы.

От страстей воздержися, и спасайся душе страстная: отложение бо брашен, пост неприятный, праве ищущим, аще и прегрешений исправление не будет.

**Богородичен:** Купину огнем горящую, Моисей Тя предзряше, Дево Богомати. Темже угаси моих страстей пещь, и огня геенны исхити и спаси.

**Иный.**

**Ирмос:** Егоже воинства небесная славят, / и трепещут хеувими / и серафими, / всяко дыхание и тварь, / пойте, благословите, / и превозносите во вся веки.

**Из** Иакова яко дванадесятоколенное, апостол из Тебе другая двоенадесятица явися Христе в мире, еюже отродися всякий верный в слове, Тебе воспеваяй во веки.

**Мысленнаго** фараона колесницы потопивше тайне, яко в Чермнем, люди Господни к земли боговедения изведосте поющия, апостоли, во веки.

**Благословим** Отца, и Сына, и Святаго Духа, Господа.

**Единаго** Бога по Существоу чту, три Ипостаси пою определительне, иныя, но не инаковыя, понеже Божество едино в триех Лицах: ибо Отец, и Сын, и Божественный Дух.

**Богородичен:** Из светлейшаго чрева Твоего прошед, яко Жених из чертога возсия Христос, свет велий сущим во тьме, ибо правды Солнце облистав, просвети Чистая мир.

**Слава** Тебе Боже наш, слава Тебе.

**Христовы** таинницы и сопрестольницы, прилежно о нас грешных всегда молящися, и ныне молите пощение все чисте преити.

**Хвалим, благословим, поклоняемся** Господеву:

**Ирмос:** Егоже воинства небесная славят, / и трепещут хеувими / и серафими, / всяко дыхание и тварь, / пойте, благословите, / и превозносите во вся веки.

## **Песнь 9.**

**Ирмос:** На Синайстей горе:

**Реки** бывше апостоли, источника умнаго, и воду живую благоисточивше сердцем чистым, моего греха струи изсушите молитвами вашими, и ко спасения путем наставите.

**Греховная** обуревают буря окаянную мою душу, десницу яко Петру мне простри, Окормителю благий: да мя глубина не покрывает отчаяния, снесь да не буду киту душетленному, Христе Многомилостиве.

**Апостольский** лик молит Тя Иисусе Всецарю, молят Тя ангельстии чини за множество щедрот, людем Твоим подаждь злых избавление, жития исправление, и Царствия Твоего присвоение.

**Богородичен:** Девство и рождество стекостася паче естества на Тебе, ковчеже честнаго освящения, Мати Дево Чистая. Темже верою вопию Ти: всего мя освяти, всего избави всякаго действия страстей оскорбляющих мя.

**Иный.**

**Ирмос: Безсеменного зачатия Рождество несказанное, / Матере безмужныя нетленен Плод: / Божие бо Рождение обновляет естества, / темже Тя вси роди, / яко Богоневестную Матерь, / православно величаем.**

**В** мире яко безплотнии, и во плоти яко ангели, слово едино в сердце носяще, привлекоште языки Христову едину веру, премудрыя и ветии яко юроди обличивше разумом, всеблаженнии апостоли.

**Петре, веры каменю, и основание: Павле проповедниче, и учителю языков: сына Зеведеова, с прочею осмерицею Христу молитесь прилежно, благомошно преити нам пощения поприще.**

**Слава: Единаго единородителю, единороднаго Сына Отче, и едине единаго свете, света сияние: и единый едине единаго Бога, Святыи Душе, Господа Господь воистинну сый. О Троице, Единице Святая, спаси мя богословяща Тя.**

**И ныне, Богородичен: Чудо** рождества Твоего удивляет мя Всенепорочная, како зачинаеши безсеменно необыннаго? рцы, како девствуеши, рождши яко Мати? Еже паче естества верою прием, Рожденному поклонися: елика хочет бо, и может.

**Слава Тебе Боже наш, слава Тебе.**

**Силою Духа к царем и князем изшедше, никакоже убоявшеся, ни огня, ни меча, победиште всякую прелесть, и спасаете человеки, воеводы Господни суще, всеблаженнии апостоли.**

**Ирмос: Безсеменного зачатия Рождество несказанное, / Матере безмужныя нетленен Плод: / Божие бо Рождение обновляет естества, / темже Тя вси роди, / яко Богоневестную Матерь, / православно величаем.**

**Светилен гласа.**

**На стиховне самогласен, дважды. Глас 8:**

**Покаяния время, / и жизни вечныя ходатай нам есть постный подвиг, / аще прострем руки во благотворение: / ничесоже бо тако спасает душу, / якоже подаяние требующим. / Милостыня растворенная постом, / от смерти избавляет человека: / сию целуим, ейже ничтоже равно, / довольна бо есть спасти души наша.**

**Стих: Исполнихомся** завтра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

**Покаяния время, / и жизни вечныя ходатай нам есть постный подвиг, / аще прострем руки во благотворение: / ничесоже бо тако спасает душу, / якоже подаяние требующим. / Милостыня растворенная постом, / от смерти избавляет человека: / сию целуим, ейже ничтоже равно, / довольна бо есть спасти души наша.**

**Таже стих:** И буди светлость Господа Бога нашего на нас, и дела рук наших исправи на нас, и дело рук наших исправи.:

**Мученичен:** В броня веры оболкшися добре, / и образом Крестным вооруживше себе, / воины благомощнии покажутся, / мучителем мужески противистеся, / и диаволу прелесть потребисте, / победителе бывше венцев сподобистеся: / молитесь Христу о нас, во еже спастися душам нашим.

**Слава, и ныне, Богородичен, глас тойже:**

**Аз** Дево Святая Богородице, / к покрову Твоему прибегаю, / вем, яко обрящу Тобою спасение: / можещи бо Чистая помощи ми.

## **На 6-м часе тропарь пророчества, глас 1:**

**П**адшия возстави ны, / отвращиися обрати к Тебе Боже, / яко Человеколюбец, / земныя содержи концы.

**Прокимен, псалом 33, глас 6: Взысках Господа, и услыша мя, и от всех скорбей моих избави мя.**

**Стих: Благословлю Господа на всякое время.**

### **Пророчества Исаиина чтение. [Глава 6 ст. 1 – 12.]**

**Б**ысть в лето, в неже умре Озия царь, видех Господа сидяща на престоле висоце, и превознесенне, и исполнь дом славы Его. И серафими стояху окрест Его, шесть крил единому, и шесть крил другому: и двема убо покрываху лица своя, двема же покрываху ноги своя, и двема летаху. И зываху друг ко другу, и глаголаху: Свят, Свят, Свят Господь Саваоф: исполнь вся земля славы Его. И взяся наддверие от гласа, имже вопияху, и дом наполнися дыма. И рекох: о окаянный аз, яко умилихся, яко человек сый, и не чисты устне имый, посреде людей нечистыя устне имущих аз живу: и Царя Господа Саваофа видех очима моима. И послан бысть ко мне един от серафимов, и в руке своей имяше уголь горящ, егоже клещами взят от олтаря, И прикоснулся устнам моим, и рече: се прикоснулся сие устнам твоим, и отымет беззакония твоя, и грехи твоя очистит. И слышах глас Господа глаголюща: кого послю и кто пойдет к людем сим? и рекох: се аз есмь, посли мя. И рече: иди и рцы людем сим: слухом услышите, и не уразумеете: и видяще, узрите, и не увидите: одебеле бо сердце людей сих, и ушима своима тяжко слышаша, и очи свои смежиша: да не когда узрят очима, и ушима услышат, и сердцем уразумеют, и обратятся и исцелю я. И рекох: доколе Господи? и рече: дондеже опустеют гради, от еже ненаселенным быти, и дома, от еже не быти человеком, и земля останется пуста. И посем продолжит Бог человеки, и умножатся оставльшиися на земли.

**Прокимен, псалом 34, глас 6: Востани Господи, и вонми суду моему.**

**Стих: Суди Господи обидящия мя.**